


# surat popular

## la'o hamutuk



institutu ba analiza no monitor rekonstrusaun timor loro sa'e



## **Banku Mundial iha Timor Lorosa'e**

Banku Mundial hola parte bo'ot iha rekonstrusaun  
no desenvolvimentu Timor Lorosa'e nian.



Doadores internasional sira mak fo tiha 166 milyar dolar  
Amerikanu atu uza durante tinan rua ho balun.

Banku Mundial mak tau matan ba fundus ne'e  
no halo planu ba projektu spesifiku  
kona ba rekonstrusaun.

Povo tenke tau matan mos ba fundus ne'e nia la'o.

# Banku Mundial iha Timor Lorosa'e

Projektu bo'ot sira ne'be Banku Mundial kaer mak:

<p><b>1) Rehabilitasaun Sistema Saude</b></p> 	<p><b>2) Rehabilitasaun Infrastruktura Emergencia</b></p> 
<p><b>3) CEP - Projektu Haforsa Komunidade no Governu Lokal</b></p> 	<p><b>4) Rehabilitasaun no Desenvolventu Agricultura</b></p> 
<p><b>5) Desenvolventu Empreza Ki'ik no Micro-finansia</b></p> 	<p><b>6) Preparasaun Emergencia ba Escola sira</b></p> 

Agora, Timor Lorosa'e simu osan/fundus husi Banku Mundial gratis.

Depois transisaun, bainhira Timor Lorosa'e independente, governu mak bele decide atu simu impresta husi Banku Mundial ka la'e.

Ita tenke hanoin no diskute malu didiak kona ba asuntu ne'e.

# Banku Mundial iha nasaun seseluk

Banku Mundial hahu iha tinan 1944

Banku Mundial fo osan no fo impresta ba nasaun barak ne'be kiak.

Uluk, Banku Mundial fo fundus barak ba projektu desenvolvimento ne'be bo'ot (sektor infrastruktura) iha nasaun ki'ik.



Agora, Banku Mundial mos fo fundu barak ba desenvolvimento sosial no “governo ne'be ema fiar”.



Maibe molok simu impresta ne'e, nasaun sira ne'e tenke halo planu kona ba haburas ekonomia nasional. Tenke iha konkordansa ho visaun Banku Mundial nian.

Banku Mundial gosta planu ekonomia nasional ne'be loke nasaun ba investimentu estranjeiru no merkadu livre.

Maibe, nasaun barak ne'be hetan tusan bo'ot halo povo terus.

Bainhira governu ida impresta osan, tenke selu fali no mos fo funan ba Banku Mundial.

Se kleur liu, tenke selu karun liu.

Se governu la iha osan ne'e, tenke impresta tan, no tusan sei sa'e aas liu tan.

Atu selu tusan ne'e, governu sei foti fali orsamento ne'be atu usa ba asistencia saude no educasaun nian.



Se hanesan ne'e entau tusan sei fo todan ba povo sira.

**Ita bele estuda husi:**

## **Esperensia Banku Mundial iha Indonesia**

Iha tinan 30 nia laran, Indonesia simu fundus barak liu husi Banku Mundial.

Maske iha Indonesia, iha korupsaun barak no violasaun hasoru direitus humanus,

Maibe Banku Mundial sei nafatin fo osan US\$25 milyar ba governu Suharto husi tinan 1967 to' o tinan 1997.

Banku Mundial (no doadores seluk) suporte modelu desenvolvimentu la'os bele continua ba oin ne'be monu iha tinan 1997 iha Krisis Monetariu Asia.

Banku Mundial nia solusaun ba problema ne'e mak fo impresta. Indonesia halo planu ekonomia ne'be halo Banku Mundial gosta, maibe governu Indonesia la tuir konkordansa ne'e.

Susar atu hetan informasaun klaru, maibe iha informasaun ne'be dehan katak Indonesia uza uituan husi fundus Banku Mundial nian atu halo kampanye pro-integrasaun iha tinan 1999.



\* Tuir ita nia hanoin, oinsa Timor Lorosa'e bele desenvolve no mos bele mantein sociedade ne'be iha justica no igualidade?

\* Tuir ita bo'ot nia hanoin, Timor Lorosa'e bele impresta osan husi Banku Mundial iha futuru ka la'e?

---

Bele halo kontaktu ho *La'o Hamutuk* iha Dili iha Farol iha Yayasan HAK nia sorin.  
Bele halo kontaktu ho *La'o Hamutuk* iha Baucau liu Escritoriu NGO Forum nian.  
Telefone:325-013 --- HP iha Dili: 0408-811-373 --- HP iha Baucau: 0438-143-724